

شو فائدة الأبحاث باختصاص علم النفس عامة وبالعلاج النفسي خاصة؟

من إحدى الأسئلة التي تنتطحر باختصاصنا هو السؤال الذي يتعلق بالمنحى البحثي شو يبيدني كعيادي أنو اتعرف ع الأبحاث وكون جزء من تطوير المجال النفسي البحثي؟ في عبارة بردها وبأمن فيها يلي هي "كل نفساني هو باحث وكل معالج مدعو دايمًا لتطوير ذاتو بهالمجال" يعني، لنقدر نكون مهنيين وخاصة باختصاصات المهن الطبية والمهن الطبية المساعدة، من الضروري ما نحد حالنا بمستوى معين منوصلوا بل من المفيد انا نضلنا بمسيرة تعليمية إن كانت أكاديمية أو غير أكاديمية، بالنهاية نحن ما منعرف كل شي بس شوي شوي قادرين نفتح عالمعلومات الغير محدودة والدراسات المعبية عالما وخاصة مجالنا النفسي

شو أهمية الأبحاث بمجال العلاج النفسي؟ مثل العادة رح نعمل برمة تاريخية سريعة لنكتشف أكثر هالعلاقة الإرتباطية:

-سنة ١٩٤١ تم نشر أول دراسة رسمية منطلقة من تجارب عيادية بجامعة أوهايو، هالدراسة شملت منهج كارل روجرز (العلاج المتمركز حول العميل)

-سنة ١٩٥٠ ألبرت إليس بلش يطبق نوع علاج جديد (علاج معرفي من الدرجة الأولى) انطلق من العلاج العقلاني وصار ألبرت يعدل ويعطي شكل تأقلمي للعلاج من خلال النظريات المعرفية وخاصة الفلسفية ومع التجارب العيادية كانت دايمًا الدراسات هي التي عم تعيد تشكيل العلاج العقلاني الإنفعالي السلوكي

-سنة ١٩٧٧ ٤ أشخاص بقيادة شخص إسمو أرون بيك عملوا الدراسة الأشهر بمجال العلاج المعرفي، الدراسة انعملت ع أشخاص بيعانوا من إكتئاب حاد وكان في تطبيق للعلاج المعرفي لفئة من الأشخاص والعلاج الدوائي لفئة ثانية ومقارنة المداخلتين وتأثيرن ووقتًا اندفع العلاج المعرفي السلوكي الذي منعرفو اليوم وضم نماذج بحثية عديدة

-بأواخر سبعينيات القرن الماضي، شخص اسمو ستانلي ريمان أطلق دراسة على اضطراب الوسواس القهري ومن هون طلعت مدرسة التعرض ومنع الإستجابة المتخصصة بعلاج الوسواس القهري -سنة ١٩٨٣، ميلر وروولنيك استوحوا من علاج روجرز وأطلقوا تجارب عيادية وأبحاث لمساعدة الأشخاص يوصلوا لأهدافن ويتغيروا ومن هون ولدت المقابلة الدافعية

-منوصل لسنة ال ١٩٨٦ والتي كانت بداية فيض الأبحاث، م ٣ أشخاص ومنن ستيفن هايس أطلقوا العلاج بالقبول والإلتزام من خلال التركيز على المرونة النفسية وكيفية تطويرها ولليوم بعدا الأبحاث عم تتعمل من أنحاء العالم على هالعلاج

-سنة ١٩٨٧ صبية اسمها فرانسيس شابيرو، كانت عم تتمشى بالحديقة ولاحظت انا حركت عيونها كانوا عم يخففوا من حدة المشاعر المرتبطة بأحداث سلبية (صدمية) وانطلقت بالأبحاث والتجارب واكتشفت مفعول حركة العينين بإبطال الحساسية العاطفية اتجاه الذكريات المتعلقة بصدمات ومن هون ولدت مدرسة من أشهر المدارس التي بتشتغل بمجال علاج الصدمات ال إي أم دي آر.

-سنة ١٩٩٠، صديقنا جيفري يونغ، انطلق بدراسة بمنهاتن عن علاج الشخصية الحدية واتوسعت لشملة اضطرابات الشخصية كافة وخاصة الصعبة بل الأصعب وهالدراسة كانت الشرارة التي أطلقت علاج المخططات التي بعدو لليوم من العلاجات الرائدة بالمجال العلاجي من خلال الأبحاث والتدريبات (ريمكو) التي عم بدريني ع علاج المخططات هوي شارك بأول دراسة انعملت وتلميذو ليونغ والرئيس السابق للجمعية العالمية لعلاج المخططات كان دايمًا يحكيها عن أهمية الأبحاث)

-سنة ١٩٩١، انعملت أول دراسة ضمن تجارب التحكم العشوائي من قبل مارشل لينهان اللي أطلقت العلاج الجدلي السلوكي وبينت فعاليتو الكبيرة مع إضطراب الشخصية الحدية وكل ما يتعلق بإيذاء الذات، الإنتحار، الخلل الوظيفي بالمشاعر والعلاقات وغيرن وبعدو لليوم هالعلاج عم يتوسع ويشمل بلاد أكثر -بداية القرن الواحد والعشرين كانت حاملة معها بدايات جديدة ومعها بول جيلبرت أطلق التجارب البحثية العيادية وصار في عنا علاج متمركز حول التعاطف النشط

كثير دراسات غيرن وعلاجات نفسية عديدة ما فينا نذكرها هون بس رح نذكر ٣ أمور اللي فينا نستنتجها من هالرحلة التاريخية:
-العديد لا بل أغلب العلاجات النفسية انطلقت من أبحاث وتجارب (المجال البحثي هوي البيئة الحاضنة اللي ولدت فيها العلاجات)
-الأبحاث او انطلقت من شمولية (علاج لعدد من الإضطرابات) أو خصوصية (خاصة بعلاج إضطراب معين)
-إننت كمان فيك تكون باحث ومدعو تترك أثرك الخاص فيك بهالعالم

إيد بإيد لنبنني عالم أفضل
بول كوكباني